

Parlamentario sra. Lorna C. Jansen-Varlack

Tin tres museo hinca den proyectonan pa San Nicolas

Un museo industrial, un museo di deporte y un museo di carnaval

ORANJESTAD - Parlamentario sra. Lorna C. Jansen-Varlack ta resalta cu banda di e proyectonan cu lo wordo realisa pariba di brug, y principalmente na San Nicolas, tin tres museo ta den e planning. Water-toren ta den e proceso di wordo drecha.

E trabounan pa drecha e toren ta hopi mas grandi cu eigenlijk a spera. Mester renoba e structura di e edificio por completo pa cu e motibo cu e kolomnan cu ta wanta e edificio ta den cay. Ora e trabounan caba lo organisa un museo industrial eyden unda diferente compania industrial manera WEB, ELMAR, VALERO y otro companianan cu Aruba tawatin den pasado lo por expone nan historia y material. Nos hendenan y muchanan di scol por admira y siña di e desaroyonan cu a tuma lugar antes na Aruba y e tecnologia nobo di futuro. Hopi informacion ta bay perdi y na varios ocasion nos no ta corda kico tawatin den pasado.

Den e renobacion di Joe Laveist Ballpark lo bin e museo di Deporte. Un idea tremendo. Den pueblo e historia di deporte ta uno amplio. Nos ta corda con den e tempo di Lago e deporte di "Cricket" tawata tuma lugá na San Nicolas organisa pa trahadonan di Lago antes. Weganan y caredanan cu tawata

tuma lugá e.c.c. Dia di La Reina den Lago Sportpark, E teamnan di "Baseball" y "Softball" di antes. Tin hopi deportista cu durante nan trayectoria deportivo a recauda hopi material y trofeo na Aruba y Internacionalmente. Un ehempel di esaki ta sr. Gaby Illidge cu tin un coleccion grandi di "Baseball" cu e kier comparti cu pueblo. Tin hopi mas deportista cu lo kier comparti nan material cu pueblo pero cu no tin e espacio pa haci esaki. E museo di carnaval cu lo wordo ubica den e edificio cu tawata antes "Green Hill Supermarket" na Bernardstraat.

Pa hopi aña esaki tawata un deseo di nos carnavalistanan pa expone e historia real, potretnan disfraz, material di musica p.e. steelpan y su historia, e desaroyonan di diferente tipo di musica cu ta wordo toca durante e temporada di carnaval, potretnan di nos reinanan, Rey y Reina di Calypso & Roadmarch etc. E museonan tambe lo ta un atraccion sigur pa nos turistanan. Si nos wak e picture grandi den futuro e museonan aki lo por habri caminda pa trabou pa nos hendenan. Pa cu nos desaroyo general e ta bon pa nos ta consciente di nos historia riba tur nivel y pa nos siña aprecia nos historia. Historia di nos hendenan tin un balor masha grandi mes. □